



Arbeids- og velferdsdirektoratet
Postboks 5 St. Olavs plass
0130 Oslo

Saksbehandlar, innvalstelefon
Tor G. Turøy, 55 57 22 22

“Inntil-vedtak” etter sosialtenestelova for sosialhjelpsmottakarar med variabel inntekt

Vi viser innleiingsvis til vårt brev datert 11. desember 2020 om inntil-vedtak” etter sosialtenestelova. Brevet av 11. desember handla om sosialstønad når kostnaden ikkje er avklart på søknads- og vedtakstidspunktet, til dømes straumrekningar og tannbehandling der kostnaden først er avklart når rekninga ligg føre. Dette brevet handlar om Nav-kontors praksis for å behandle søknader om sosialstønad til brukarar som har låg og variabel inntekt.

Nokre sosialhjelpsmottakarar har variabel inntekt, og så låg inntekt at dei har behov for sosialstønad. Inntekta varierer til dømes ut frå kor mange vaktar dei får, og kva inntekt dei får vert først klart når dei får løn. I slike tilfelle har Nav berekna kor mykje pengar vedkomande treng for å ha nok til eit forsvarleg livsopphald, og gjort vedtak om at vedkomande skal få utbetalt differansen. Slike vedtak vert gjerne gjort for ein tremånaders periode. Vedkomande vil då vite at dei er sikra nok pengar til livsopphald i perioden. Når vedkomande leverer lønsslippen til Nav, vil Nav i medhald av vedtaket kunne utbetale differansen opp til livsopphaldsnivå. Vi har lagt til grunn at slik praksis kan vere føremålstenleg for både sosialhjelpssøkarane og for Nav. På bakgrunn av lovtekst og direktoratets avklaringar i rundskriv 35, har vi ikkje kunne konkludert med at praksisen er lovstridig.

For stønadsmottakarar med variabel inntekt får direktoratets nye lovforståing den konsekvens at Nav ikkje kan innvilge sosialstønad på førehand, og ikkje for lenger tid enn fram til neste lønsutbetaling. Stønadsmottakaren vil ikkje lenger få tryggleik for kva familien kan rekna med å få hjelp til i eit noko lengre tidsperspektiv. Vedkomande må søke på nytt kvar gong dei får lønsutbetaling, og Nav må gjere nye vedtak kvar månad. Vi kan ikkje sjå at direktoratets nye lovforståing er fordelaktig eller føremålstenleg for korkje sosialhjelpsmottakarar eller Nav.

Etter dette finn vi det føremålstenleg å be dykk vurdere saka på nytt. Dersom de konkluderer med at Nav ikkje kan gjere vedtak etter sosialtenestelova før dokumentasjon på inntekt ligg føre, ønskjer vi at de informerer nærare om dei juridiske vurderingane som ligg bak ein slik konklusjon, og at de legg dei juridiske vurderingane inn i rundskriv 35.

Med helsing

Øystein B. Jacobsen
seksjonssjef

Dokumentet er elektronisk godkjent



Kopi til:

- Helsetilsynet
- Fylkesmennene
- Bergen kommune, Etat for sosiale tenester